

中外新遊記

汪伯訓編



上海商務印書館發行



中外新遊記

江伯訓編

(三)

商務印書館發行

中外新遊記卷三

西盟遊記

勺與

民國二年春。仲遴王君傳燭。奉命宣慰內蒙古。烏蘭察布盟。古吳陳子份隨行焉。公餘輒將途中經歷。筆以記之。五十日間。積稿盈簏。以歸。復刪繁就簡。筆削經句。始示（壽文）。陳子富冒險性。足跡半天下。南洋遊記。漱潤軒叢談。泰岱紀異。均出其手。斯記起北京。終四子王旗。於其山川道里。風俗人情。尤加詳焉。熱心邊事者。其三復之。虞山公羊壽文誌。

正月五日晴。寒暑計早十九度。午二十七度。晚二十度。上午十一點五分。由西直門京張鐵路開車。北行。一望平原無垠。回首都城。漸入煙際。二十五分抵清華園。西望山陵綿互。五十五分抵清河。（距西直門二十里。京張路線起豐臺鎮。自豐臺至西直門。計二十七里。經廣安門站。）站以清河名。河源出京師西北之西山。南流入運河。北京自來水公司。所需水量。實賴此河。陸軍第一預備學校在焉。十二點十五分。車折東北行。抵南口。三十五分開。山勢愈上愈高。車機改向後推。速度減三分之一。車行山峽間。峽寬不及十丈。峭壁峻峭。危石欲墜。軌蜿蜒曲折。繞東北。折西南。五十九分抵東園。略停。俟康莊下行車也。

京張路線。共分六段。首二段。或高或下。隨山勢之起伏。每三十餘里。即有兩山交叉處。車至此。不能直

行。特設雙軌。上行初由左軌。至此卽折回。馳繞右軌。漸行歸故道。蓋自上而下之車。來勢過急。故於此緩行線上。減其速力。以防不測也。車上行斜度。爲一至十一度。此路線係我國完全主權。一切設施皆我華人。總其成者。爲粵東詹天佑氏。

一點四十七分下行車來。四十一分開。折而北行。速力更減二分之一。二點四分進山洞。七分出洞。此爲第一洞。卽居庸關。洞深二里弱。京張大道。在軌之左。三十分經上關。三十三分經下關。二關今均就圯矣。出居庸關。車中口占一律。以寫興感。工拙不計也。

繫昔固閉時。雄分上下關。今迺重交通。鑿開南北山。相去千餘年。居庸久頽殘。落日敞幽燕。大漠雲漫漫。天險寧足據。人事茫無端。唯有關山月。長年照客顏。

三十七分至三堡站。四十分過烏龜頭山洞。四十五分過石佛寺山洞。行一分鐘。折西行。山麓積雪未消。六郎營在東南。土人云。宋楊業子延昭屯兵處也。五十二分抵青龍橋。距京百零六里。死山枯石。一片荒涼。仰望長城雉堞。高矗山巔。三點五分。進叭噠嶺山洞。十分出洞。洞長三里。有奇。爲京張路四洞中之最長者也。車機調車前。速度頓加。出口與洞南風景迥殊。遠山縱列。樹木鬱茂。兩岸阡陌。有內地村落間意。二十五分。抵康莊。距京一百二十八里。該莊西臨延慶。北界懷來。商店甚夥。居民亦盛。三十分開車西行。沿途地勢遼闊。村居櫛比。四十七分至懷來站。距縣城三里許。縣城築山上。綿延數里。勢若長城之縮小。

者焉。山下河流曰洋河。環於站之西南。五十分西南行。四點三十五分至沙城站。車馬雲集。土人狀極古樸。四十三分開。折西北行。五點至新保安站。距京二百零六里。城在鐵道南。東有古廟。規模宏壯。未詳其名。五點二十分。經雞鳴山。山矗立巍峩。高數十丈。山下有雞鳴關。關上有古廟戲樓。山產煤。設有礦務局。開井挖取。煤苗甚旺。惟以舊法採取。出煤不盛。二十七分至下花園。六點十五分至宣化府。距京二百八十里。站之附近多旅館。商業頗盛。二十分開。五十分至沙嶺站。七點四十分抵張家口。寓橋東迎賓樓。六日晴。寒暑計早十七度。午二十三度。晚二十度。晨參謀部調查員馬君子林來謁。仲遴。同人偕談。久時。得悉豪情甚詳。（詳烏盟慰問記）十時偕孫君體仁（漢）汪君漢深（浩）往訪鐵路站長鄔某。鄔粵東籍。居張久。於張之情形頗熟。午後復偕二君於橋東及上下堡一遊。奔走半日。飽嘗塵土矣。晚滙通車行主李某來謁。李貫市人。頗誠實。趕車起家。據云。畢生精力。俱付於京綏道中（自京師至綏遠大道）矣。有所詢。答覆詳盡。可感也。茲據鄔李二君所告。及途中所見。拉雜紀之。

張家口居京西北三百三十七里。北緯四十一度。西經一度三十七分。較北京高一度有奇。爲關內巨鎮。隸宣化府。北出通橋。道途廣闊。赴蒙古糧臺之大道也。（自張家口至庫倫共四十四臺站。隸察哈爾者三十二。隸庫倫者十二。統稱阿爾泰軍臺。共分三路。一老官道。臺路也。爲官吏或有公務者之通行驛站。計九百七十一英里。迂而穩。一小通路。盡草地。爲隊商行旅往來之通行路。計八百四十英里。

捷而僻。又有一小道。爲俄人所有之電信線路。計六百八十六英里。路最近。惟險僻難行耳。南連北京大道。自懷來縣土木驛。與獨石口分途。過雞鳴山。至响水鋪。千巖萬壑。路極難行。自建火車。途人告便。東逾山可達山海關。西爲孔家莊。逾西灣堡。卽爲山西地。東北十里許。有玉兒山。以山腰中石雕之小兒得名。雨雪之後。卽可望見。玉兒山下。有兔兒溝。逾玉兒山爲二道邊。上有長城舊址。復越頭道邊。卽爲大草地。（蒙人遊牧地也）西北十里許。爲東西二太平山。逾太平山五十餘里達草地。東二百餘里。亦草地。西北七百餘里爲喇嘛廟。前清咸豐十年。中俄續約。闢爲商埠。全鎮南北約十里。東西二里有奇。鎮分上下二堡。玉帶橋北爲上堡。南爲下堡。上堡南北長里許。東西不及一里。下堡南北二里有奇。東西約一里。下堡有磚城。二堡東南有通橋。橋長二十餘丈。互通河。河自大草地流來。西南六十餘里。流入洋河。注懷安縣地。通橋東。火車站在焉。俗呼橋東。戲院妓館大飯莊均在此地。此地爲十年來怡安公司新闢者。怡安街、平康里、福壽街。在橋東爲最盛。此外之熱鬧場。則有南北五城街。上堡邊街。名勝古蹟。則有茨兒山。在下堡西。元寶山在上堡大門外。進口貨由口外來。以皮毛貨爲大宗。運往內地。出口貨以茶磚、洋雜貨、布疋爲大宗。銷售蒙古一帶。駐張及分駐口外之軍隊。計第一師步兵一營。第二團第三營之二中隊。騎兵第一團第二營之二中隊。砲兵第一團四中隊。工兵第一營全營。機關槍十四架。輜重兵第一營全營。此外又有巡防隊三營。馬隊二營。保衛隊六營。而司令郭任上。駐長

陸軍紀律不嚴肅。服裝亦欠整齊。鬧戲院。搗妓館。日有所聞也。戲院二。妓館分三等。共百餘家。七日晴。寒計早十七度。午四十二度。晚四十四度。晨戴星赴車站。七點五分開車。南行。兩岸矮山起伏。二十六分折西南行。逾大洋河。（自天鎮縣興平村二道河流來）。河迤邐延布於京張張綏鐵道之南。三十分繞山腳西行。四十三分抵孔家莊。停二分鐘。折北行。五十三分。復折西南。左岸山石聳立。巖前積雪未消。八點十七分抵郭磊莊。莊隸萬全縣。距縣城五十里。居戶三百餘家。四十三分逾小洋河橋。橋長三十餘丈。四十五分抵柴溝堡。（小洋河源出大同府聚樂村。上流爲白登河。至柴溝堡。匯入大洋河）。堡在站東。居戶千餘家。圍以土堡。隸懷安縣。距縣城五十五里。九點三十五分至西灣堡。在車站東二里許。居戶百餘家。西距懷安縣治三十里。右岸數里。矗立秀挺者。華山也。華山之左有向陽山。亦高聳。九點五十五分開車。三十里抵永嘉堡。爲燕晉二省分界處。十點三十五分抵天鎮。縣城在車站南七里。五十二分抵羅文皂。十二點二十五分抵陽高。寓隆和棧。

二日內所經者皆帶山。在軌北者曰北山。南者曰南山。二山係一脈。太行山脈之支幹也。自殺虎口迤邐東下。抵居庸關。二道邊牆在北山南麓。已殘毀。長城舊址也。京晉大路。在南山南麓。至大同府分途。西南達太原。西北抵歸綏。別有小途。在洋河右岸。路最近。惟山水發時難行。

晉省北部。荒蕪特甚。非如南部之爲商業薈萃區也。土人食以高粱油麥爲大宗。富者研屑去皮。和水

蒸食。窮者和糖食之。窮富均臥土炕。然薪炭取暖。窮者被席皆無。肉土而臥。盛產粟麥高粱。無大宗出口。價以是廉。天鎮陽高一帶。粟每斗洋八角五分。計二十二箇。箇斤有半。計合三十三斤。高粱石六元。運至北京。粟每百斤可售洋百元。高粱百斤十元。故商人趨之如鶩云。

行裝甫解。自張家口同車來。一形跡可疑俄人。亦假居此棧。該俄人華服華語。行蹤詭秘。聞爲俄之偵探。噫。俄誠狡矣哉。

午後去縣署調查並煩代僱赴綏車輛。知事梁萬春以選舉事去大同。晤民治科長燕某。（知事以次設民治財政教育司法四科。）車價昂。改由隆和棧代僱。僱定雙套騾車三套大車各若干輛。雙套價銀六兩。三套價九兩。由綏開來之回頭車也。價較縣署所僱殺五分之一。

陽高一名陽和。古雲中郡也。漢初爲白登城。明洪武三十一年廢白登。築陽和城。成化八年置儒學。前清順治三年。改陽高縣。雍正三年改儒學爲訓導。設典史。隸大同府。民國元年六月。裁大同府直隸省垣民政長。縣治區分一百六十三村。東三十五里。界天鎮縣。南四十里。西六十里。界大同縣。（大同府改）北出邊牆（長城也）二十里。界豐鎮縣。城廣袤均五里奇。縣署建設城內西街。壬子四月。經陸軍焚毀。現移駐署東小關帝廟。縣駐馬隊一營。（山西中路一旗）城內駐有一連。營長王同春。河南人。巡警六十名。甚腐敗。壬子四月十九。陸軍一鎮兵變。陽高大受糜爛。北樓大閣被毀。城垣亦被礮毀。多半

就圯。商家經兩月始漸開市。兵變時。城內除地宅不計外。損失財產六十餘萬。以是商業甚凋零。云。城內南北二街。大商家不及五十。居民全境不及十萬。耶穌教堂一。教民六百餘。

城北十二里有雲門山。俗云孫賓修道處。上有觀音廟。叢樓傑閣。遙望如在雲際。五月十九日大會。士女雲集。百貨薈萃。北城上有陽和臺。臺石壘。高不及丈。旁有碑誌。惜爲風雨所毀。模糊殘缺矣。城南九里有桑乾河。自縣南入境。

八日晴。早十七度。午二十度。晚二度。上午十一點十五分自陽高起程。換乘驛車。王營長派馬兵五名護送。車行雷動。塵土頓起。西北行。十里。十二點二十分。經小村河。折而西行。河一名鎮川。自西北二十里。鎮川關流來。河寬數丈。堅凍入底。居南北二帶山中。邊牆在北山南麓。二山相距不及二十丈。山溝中徧鋪瓦礫。車行維艱。又十里至埠子灣。村戶約五六十家。沿山築居。屋盡破陋。窮荒實甚。經盤腸河。盤旋曲折行冰上。三點五十分至二十六莊。出口。莊距陽高三十五里。居戶不及十家。盡係客店。北里許爲鎮宏口。口在兩山間。長城在其東南。地勢險隘。要塞也。復十里。至大營子宿焉。客店甚卑陋。炊煙迷目。呼吸維艱。予幸車馬勞頓。著坑卽入睡鄉矣。

大營子居戶四十餘家。客店五家。人口三百餘。男婦均以種植爲業。農事而外。他無所知。愚陋無識。可笑可憐。出產以油麥胡麻爲大宗。地價甚廉。畝二百四十弓。佳者五六元。劣者一元可購三畝。每畝年

獲三四斗。歉則顆粒不收。鑿井汲飲。色渾質重。其重量與自來水約一與三之比較。晉省多罌粟。此地尚無種者。南二十里有採藥山。俗謂孫儋採藥處也。

晉省盛產煤。煤之最佳者名煨炭。質堅。含炭精最富。方尺許之煨炭。然埋灰中。可經多日。土人云。新婦歸寧。爲其夫然炭取暖。月餘而歸。炭仍然著。煨炭以產忻州一帶者爲佳。

初九晴。早十五度。午十三度。早七點起。頭岑岑痛。蓋昨夜受惡空氣所致也。八點半起程。十點三十分。計行三十里。抵官屯堡。在新盛店打尖。室築高臺。(俗稱火炕)臺下然炭取暖。矮几小凳。敝廬可笑。居戶百餘家。商鋪五家。車店四座。所需物品。均自大同豐鎮運來。此地地勢高。天氣寒。南行八十里。可達大同。十一點四十分。行五里。至小官屯堡。三里至王家營。二里至孟家營。居戶各六七十家。十里至黑格大窪子。百餘戶。五里至小莊墻子。戶七十餘。以上小村。櫛比相連。沿途樹木繁盛。頗有內地風景。長城舊址在其南。五里至盤道山墻口。二點四十分上墻。奇峯怪石。累卵欲墜。山道崎嶇。車行其間。顛跌傾軋。雙套驢車連翻三輛。箱籠皆破碎。隨奔高鳳樓。墮傷左臂。予等皆下而步行。約十里。四點五分下墻。狂風驟起。黃沙蔽日。越盤道山河。西行二十里。南望得勝口。四面皆山。平頂無峯。奇觀也。五點五十分經砂礫場。抵豐鎮縣。住德源鹽店。

豐鎮本內蒙地。前清末葉。劃歸晉省。隸大同。設同知治焉。民國元年春。改縣。共分六區。東南百二十里。

界陽高。西百八十里界寧遠。南二十里爲得勝口。北三百二十里界陶林。人口二十餘萬。爲邊外繁勝之區。回民頗衆。盡居城東北之隆盛莊。蒙人往來貿易。居此者亦頗不尠。城內關帝廟一。規模雄壯。耶穌教堂一。牧師瑞典人。五區天主教堂十餘。神甫多比意二國人。士人以務農爲本。無大富。多小康。民情愚而詐。好訴訟。商業分錢、店、布、當、乾、油、研、麪、八行。共百餘家。多忻州人。土著爲少。進口貨來自山東、直隸一帶者。以洋貨布疋爲大宗。出口貨以雜糧胡麻爲大宗。雜糧運往直隸一帶者。年約數百萬石。胡麻歲出約四五十萬石。日本商三井洋行。在此設莊收買。德法美商亦兼有來者。城內小學堂二。高等初等各一。織布公司一。專織土布。頗獲利。巡警中區六十人。餘五區。共百二十人。駐步隊馬隊各一營。（步隊爲山西巡防中路第二旗。舊制。駐大同歸化一帶軍隊。共十六旗。大同一帶爲裏八旗。歸化一帶爲外八旗。光復時。內八旗裁去一旗。元年十一月。改編陸軍。旗二百餘人。）豐鎮北毗察哈爾。西連土默特。地勢險隘。邊外要塞也。無城圈。合附近數村而成。南北三里。東西五里奇。壬子秋九月。土匪蠭起。官署被焚。居民大受損失。至今元氣尚未恢復云。

十日陰。早九度。午十一度。晚二度。晨起大風拔木。黃沙蔽天。車從難行。况連日勞頓。遂於豐鎮靜息一日。午後風稍平。縣知事樊文鼎來謁。晚晴去縣署。代王君答拜也。晤樊君。暢談至十時返棧。占得二絕云。昨過盤山路逶迤。朝來風雪更離迷。僕夫告瘁輪蹄困。且向荒村捲客旗。

蒼茫野道風似虎。斷續炊煙火亦涼。山色漸深人形矗。不知是夢是斜陽。

十一日晴。晚微雪。早十三度。午九度。晚二度。八點半由豐鎮起行。九點四十五分過二道橋。計程二十里。沿途山坡起伏。風景入畫。小村十數。依山築宅。則又極形窮陋。東來駱駝百餘。滿運小麥、收麥、雜糧等。均自北山外半草地及廠汗不浪一帶。來豐鎮求售出口者。十點越大河。沿大河南岸西北行。地勢漸高。天氣陡變。無風而慄。堅冰在巔。十點至都村。臨溝築室。穴地而居。十點四十分至馬廠。背依馬王廟河。馬王廟河與大河同流異名。源發馬王廟莊西三里。南流入大同玉河。沿南岸西北行。十一點二十分至馬王廟莊。莊西南百二十里。有鑛家嘴山。盛產煤。掘有煤井十餘。土人鑛掘斧鑿。不需機器。日出煤約萬餘斤。云十二點五十五分啓輪。大風起。黃沙蔽天。十步內不辨人物。沙礫颭面。如被金刃焉。二點四十分至天春村。隸寧遠。居戶數百家。貿易尙盛。巨村也。繞村西北行。越小山嶺十餘。車播蕩不已。如被洒然。四點四十分至韓慶壩。長五里。山勢聳立。盤山鑿道。險亞盤道山。逾壩二里至韓慶壩底。宿焉。店主韓姓。一清癯老兒也。知書識禮。營業之暇。則課其子女。子女均俊秀。美材也。而乃生此荒村。終於庸流。明珠在櫝。予深爲之惜也。

韓莊隸豐鎮。西北臨大海。（土人名曰大海。實則閉口湖也。）海面廣闊。東西長三十里。南北百餘里。前臨東山。（一名柳樹平。一名平頂山。）地勢低窪。山水流入。排泄無從。雜質積穢。更受日光之蒸化。

作用。變成鹽質。盡蘊於海灘泥中。土人掘之。煎煉成鹽。汲飲海水。則仍爲淡味也。大海東半屬豐鎮。西半屬寧遠。地勢雖低。天氣則甚寒。地含鹵質。土脈最劣。畝地年獲二斗。稱豐收也。北逾東山爲哈少湖兔。巨鎮也。

日來沿途所見婦女。無論老幼妍媸。均蓮步珊珊。作臨風搖擺勢。俗云關西女子多小足。其陋俗信如斯也。

十二日晴。早十度。午十三度。晚零下二度。七點自韓莊起行。沿大海東灘北行。一望雪光。無坡陀風塵之色。小村十數毗連。總名洒其湖兔。朝曦初升。炊烟繚繞。雪光與山色鬪妍。佳景備集。心曠神怡。樂極而忘其勞與寒矣。坡上橐駝數百。聞爲山北富家所畜。口外富家。以牲畜數之多寡計。不以財產計也。駝每頭價三十餘兩。負重石許。食少耐勞。九點十三分。行二十里。至麥湖兔。麥村東西長五里。南北寬不及二百步。居戶數十家。客店五六家。土人穴地而居。然煤取暖。多有受煤毒而死者。九點三十六分。出麥村。折西北行。十餘里至沙袋溝。壁壘巖巖。夾溪流一線。寒氣逼人。此溝爲前清光緒二十六年新闢。十一點二十分至蘇集。距韓慶壩五十里。居戶雖不及十家。客店布置。尙頗清潔。十二點三十分行。二點二十五分至小壩。壩同治年間所開。長二里。寬僅容一車。輿人至此。呼號而過。止東來車也。曲折盤旋。不如韓慶壩。崎嶇險阻。不如盤道山。然僅此羊腸小道。亦足以限敵人戎馬足矣。塞外多險地。信然。二點四十五分出小

壩。西行。越數嶺。四點經五里壩。至廠漢不浪宿焉。今日共行百里。

廠漢不浪譯蒙意爲白山口。前清道光間所闢。隸寧遠。居戶百餘家。商鋪七家。以當酒二行爲盛。（口外當局均兼售鹽酒雜貨等物）東北百四十餘里。有陶林縣。（蒙古名魁布兒。又名科布兒。地勢最高）隸察哈爾旗。邊地之要隘也。南去寧遠百四十里。（由小路僅八十餘里）

自廠漢不浪逾盤道山而西。長城以北。青山以南。昔爲蒙古遊牧場。蒙人游牧成習。無所得。卽棄去。前清道光年間。爲晉人所據。開闢經營。農業繁殖。儼然一新天地。今晉人子孫繁衍。蒙人殆絕跡矣。

十三日晴。早零下二度。午三度。晚一度。七點半由東山溝西北行。山嵐隱雪。朝噉斜射。作翠黛色。小村三五。點綴道旁。乘車起落。如入畫圖。美景飽餐。征人益興勇進之心矣。

行六里許。懸崖對峙。石質斑駁。古氣盎然。八點四十五分。至紅沙壩子。居戶二十餘家。就山掘穴。與獸雜居。西有溫泉。熱氣蒸騰。而泉外山澗。依然冰雪。九點三十分。至大榆樹村。距廠莊二十里。古榆夾道。幽寂無人。十點四十分。經黑瀾村。十一點十五分。經水磨村。村分東西。相距里許。十一點二十五分。至大州窰

午餐。十二點四十分行。二點五分。二十里經圈圖。（蒙古音庫而呂阿。Coorear）意圈城也。（此二字從未之見。從口與四方八面。不知何人所造。而出於此。亦奇矣。）居戶四十餘家。復行二十里。經五十家子侯家窰子。三點三十分。入歸化境至石人灣。居戶五十餘家。再進。至買墩村宿焉。時五點五分。今日計

行百里。

買墩村居戶二十餘家。商鋪二家。村前小河。名買墩河。自村東北三十餘里塔不齊村流來。匯石人灣河。東南流入大小黑河。村東有龍皇廟。規模宏大。前清乾隆時。有公主下嫁於此。今尚有公主府舊址。村駐二旗步隊八棚。共八十八。隸外八旗。北爲板合上。漢蒙雜處。南十里爲南店。二十里爲花合上。與哈喇慶。二十里爲共喇嘛。東山溝各莊。所耕地畝。地主均蒙人。租價畝銀兩許。產小麥、蕎麥、山藥數種。今日爲陰曆十二月初七日。初八俗稱臘八。關外土俗。於臘八前一日。覓大冰鑿尖。倒置積糞上。於初八朝曦未升時。煮紅豆粥。取汁澆冰上。視其色之紅否。色紅豐收。否則歉收。或云是日爲地藏王生日。糞穢物。以冰掩其臭味也。冰往往有負自數百里外者。愚矣。

十四日晴早五度。午二十一度。晚十七度。八點行。五里出東山溝。北望山嶺平延。勢如長蛇。南則高阜起伏。山村散布。五里至鐵面。十里經白塔村。以村前磚砌浮圖得名。浮圖九級。高五丈許。村之周圍。原有土城。今已頽廢。宋時於口北建連城十二。以防契丹。白塔歸化而外。均無可考矣。歸化乃就原有之城基。擴充而成者。浮屠宋楊業子延昭紀功塔也。十里經把柵。把柵東西二村。各四十餘戶。五里至稻河楞。（一名多河嶺）。時十二點十五分。於吉利店午膳。店主蒙人。曉華語。室中銅佛鐘磬。布置整齊。客室亦較前所經爲潔。屋頂窗楞。寒霜厚結。五十分行。七里經蒙古把柵。居戶百餘。盡土默特旗人。業牧戶者。居其半。

數。八里經小營子。道平車穩。阡陌夾路。心神一爽。五里至茶房營子。綏遠張鏡宇將軍。派巡捕二員。馬隊一排。郊迎至此。三點五分進綏遠南門。復有步隊完全一營。迎送至將軍署赴筵。五點至公館休息。公館假歸化西順城街德亨魁店。攜來箱籠。沿途屢經顛跌。所儲物件。多半損毀。

按逾小營子。氣象一新。將軍牧場。新墾地。數十萬頃。一望無垠。榆樹遍植。亦舒舒有生氣。聞此地墾植公司。開辦不及十年。乃獲是美滿效果。是亦在夫經理之得人否矣。

陽高歸化路程表

陽高(三十五里至)

二十六莊(十里)

大營子(三十里)

官屯堡(五里)

小官屯堡(五里)

孟家營(十里)

黑格大窪子(十五里)

小莊墻子(十五里)

豐鎮(二十里)

馬廠(二十里)

馬王廟(二十里)

天春村(二十里)

韓慶壩底(二十里)

麥湖兔(三十里)

蘇集(五十里)

廠漢不浪(二十里)

大榆樹(二十里)

大州窰(二十里)

圜圖(二十里)

石人灣(二十里)

買墩村(十里)

鐵面(三十里)

稻河楞(十五里)

小營子(十五里至)

歸化城

自陽高至歸化。由口外草地行。共四百七十五里。通稱四百八十里。如由口內大道行。經大同、寧遠。共

五百六十里。陽高至歸化。極速須四日。數年之後。張綏鐵路告竣。（滿運告終時已修至陽高西百餘里大同縣境。）十二小時。可以往返。其便利爲何似。自北京西北行。地勢漸高。寒度亦漸增。由二十六莊出口。地勢忽低。經豐鎮。又漸高。至廠漢不浪。乃達高之極點。與盤道山以東。爲一與四之比較。人民生計。地產盛衰。亦皆與其天氣地勢作正比例。過買墩。雖山嶺環繞。而地勢則漸就低下矣。至歸綏。乃達低點。試以氣候較之。北京冬時平均晨十九二十度之間。張家口十七度。盤道山西韓慶壩十三度。廠漢不浪零下二度。買墩零度。歸綏十七度。廠較歸綏低十九度。較北京低二十一度。張家口與歸綏同度。天時地勢。判別如此。益以交通之不便。其人民進化程度。遂可概見矣。

右京綏道中十日記終

十五日晨小雨雪。午晴。早二十度。午二十二度。晚十七度。午前將軍張鏡宇來。據云烏盟六旗王公均在綏遠。首先來綏者爲茂明安旗。正盟長四子王則係派兵要來者。餘如伊克昭盟七旗王公。亦均在此。此地雖爲塞北大埠。而開通者甚少。所有一切新事物。均自東南傳來。報紙雖有二種。（歸綏日報、牖報）本地日銷。則各不及五百分。報之篇幅亦極小。不及京師報紙十分之一。於以見其風氣之固陋矣。

綏遠在歸化東北五里。雉堞高聳。周二千丈。高三丈餘。門四。係前清乾隆四年建。居紅山口之南。大青山擁抱其後。伊克吐爾根水環繞其前。喀爾沁水帶其左。紅山水匯其右。地勢寬平。山林拱向。亦晉